

Tiga prinsip utama majukan luar bandar

PUTRAJAYA 27 Jun - Dasar Pembangunan Luar Bandar (DPLB) yang menyediakan kerangka hala tuju pembangunan luar bandar, menggariskan tiga prinsip utama ke arah menjadi negara maju dan berpendapatan tinggi.

Menteri Pembangunan Luar Bandar, Datuk Seri Rina Mohd. Harun berkata, tiga prinsip tersebut adalah kemampanan, inklusif dan holistik yang masing-masing merangkumi asas kelangsungan kesejahteraan hidup, keseimbangan dan meliputi pelbagai dimensi, termasuk sosial.

“Tiga prinsip utama ini adalah sangat penting untuk merangka kesinambungan pembangunan masyarakat luar bandar yang sejahtera, inklusif dan mampan.

“Selain itu, bertujuan menjadikan luar bandar menarik dan kondusif sebagai tempat tinggal, bekerja dan membuat



TIGA warga kerja Kementerian Pembangunan Luar Bandar menunjukkan buku Dasar Pembangunan Luar Bandar 2030 yang dilancarkan oleh Dr. Mahathir Mohamad di Putrajaya semalam. - BERNAMA

pelaburan serta merapatkan jurang ketidakseimbangan antara penduduk bandar,” katanya ketika berucap dalam Majlis Pelancaran DPLB 2030 di Pusat Konvensyen Antarabangsa Putrajaya (PICC) di sini.

DPLB 2030 dilancarkan oleh

Perdana Menteri, Tun Dr. Mahathir Mohamad.

Menurut Rina lagi, DPLB juga menggariskan 10 teras, 33 pernyataan dasar dan 88 strategi yang akan dilaksanakan hingga 2030.

Katanya, antara 10 teras itu

adalah ekonomi berdaya saing dan mampan, keusahawanan pemacu pembangunan ekonomi, modal insan berkualiti dan prasarana lengkap dan canggih.

“Lima lagi adalah keunggulan generasi remaja luar bandar, wanita luar bandar yang progresif, kehidupan luar bandar yang sejahtera, sistem penyampaian dan tadbir urus berkesan, biodiversiti dan alam sekitar mampan dan perumahan, pembangunan wilayah dan penempatan desa bersepadu,” katanya.

Tambah Rina, penglibatan dan sokongan semua pihak amat diperlukan dalam menjayakan DPLB untuk merealisasikan setiap inisiatif yang digariskan.

Sehubungan itu, beliau berkata, pihaknya merancang untuk mengadakan sesi sebar luas bagi setiap dasar untuk memberi kefahaman mengenai strategi dan langkah dalam dasar terlibat.